



Här Fernand Etgen
President vun der Chamber

Lëtzebuerg, den 20. Januar 2022

Här President,

Esou wéi den Artikel 80 vum Chambersreglement et virgesäit, bieden ech Iech, dës parlamentaresch Fro un den Här Educationnsminister weiderzeleeden.

Fir ze bauen, brauchen eis Entrepreneure gutt ausgebilt a virun allem genuch Personal. Et schaffen zwar vill Leit aus der Groussregioun am Bausecteur, trotzdeem gëtt et aktuell eng Penurie un Aarbechter. Dowéinst spillt d'Ausbildung vu jonke Leit am Baufach hei am Land eng wichteg Roll.

An dësem Kontext wéilt ech folgend Froen un den Här Educationnsminister stellen :

- Kann den Här Minister confirméieren, dass trotz héijem Bedarf am Secteur d'Zuel vun de Bautechniker-Schüler am éischten Ausbildungsjoer am Lycée Josy Barthel zu Mamer am Verglach zu 2011/2012 em 50 Prozent erofgaangen ass ?
- Wa jo, wat sinn d'Ursaachen a wat gedenkt den Här Minister z'ännerhuele, fir deem entgéint ze wierken ?
- Kann den Här Minister confirméieren, dass aus Plazgrënn vun dësem Schouljoer u keng BTS-Klasse méi kënnen am Lycée Josy Barthel zu Mamer ënnerriicht ginn an dass dës Klassen op de Geeseknäppchen transferéiert gi sinn ?
- Wa jo, wéi staark sinn d'Ausbildungsplazen an de Bauächer am Mamer Lycée am grouse Ganze limitéiert ?
- De Lycée zu Klierf sollt am Ufank och Schüler an de Bauächer ausbilden, dat gouf awer dunn op eng spéider Phas reportéiert : Vu wéini u soll et déi entspriechend Ausbildungen zu Klierf ginn ?
- Wäerten d'Ausbildungen zu Klierf sech, wéi zu Mamer, op den Héichbau konzentréieren ?
- Wéi eng Bauberuffer sollen allgemeng am Klierfer Lycée ausgebilt ginn ?
- Wäert mam Ausbau vum Klierfer Lycée och Plaz entstoen, fir d'Ausbildung am Déifbau unzebidden, déi et sou nach net zu Lëtzebuerg gëtt ?
- Wann net, firwat net ?
- Wa jo, ass geplangt, och de Lycée zu Mamer an deem Sënn weider ze entwéckelen an auszebauen ?

Här President, ech bieden Iech, mäin déifste Respekt unzehuelen.

Martine Hansen

Co-Fraktiounspresidentin



**Äntwert vum Minister fir Educatioun, Kanner a Jugend, Claude Meisch, op d'parlamentaresch Fro
Nr. 5534 vun der honorabeler Deputéierte Martine Hansen**

Ad 1)

Et ass richtig, datt am Lycée Josy Barthel (LJBM) d'Zuel vun de Bautechniker-Schüler (technicien en génie civil) am éischten Ausbildungsjoer ëm ongeféier 50 % erofgaang ass.

Ad 2)

Et muss ee leider feststellen, datt d'Attraktivitéit vun den technesche Beruffer am Allgemengen zeréckgaang ass: Ee vun de groussen Defien an den nächste Joren zu Lëtzebuerg, grad wéi och an eisen Nopeschlänner, ass d'Penurie vu qualifizierter Main-d'œuvre.

Dofir huet de Service de la Formation professionnelle (SFP) an Zesummenaarbecht mam Héichschoulministère an dem Aarbechtsministère am Kader vum sougenannte *Skillsdësch* eng grouss Etude iwwert eng *National Skills Strategy* lancéiert. Hei ass nieft ville bilateralen Entretien en éischte Workshop mat alle Verrieder aus der Ekonomie am leschten Oktober organiséiert ginn. No engem zweete Workshop am Abrëll 2022 wäert d'OECD Enn des Joers ee Rapport ofliwwere mat Propositione fir eng kohärent an effikass Strategie, fir datt eist Land an den nächste Joren d'Leit mat deene Kompetenzen kann ausbilden, déi gebraucht ginn.

Eng weider Etude, déi vun der Europäescher Kommissioun finanziert gëtt, kënnt och deemnächst mat hire Recommandatiounen eraus, wéi déi initial Berufsausbildung ka méi attraktiv gemaach ginn. Och dës Etude baséiert op dem Dialog mat den Acteure vum Terrain.

Wat d'Formatioun vum Génie civil betrëfft, sou muss secher de Contenu an d'Methode reforméiert ginn. All Berufsprofiler an Ausbildungsprofiler vun der Formation professionnelle ginn an Zesummenaarbecht mat dem Service de Coordination de la Recherche et de l'Innovation pédagogiques et technologiques (SCRIPT) an de Chambres professionnelles iwwerpréift, sou och d'Bauberuffer, notament den Technicien en génie civil.

Donieft ginn och grouss Efforten an der Orientatioun ënnerholl. Esou organiséiert d'Chambre des métiers zesumme mam SCRIPT Atelierer schonns am Enseignement fondamental, fir d'Schülerinnen an d'Schüler fir manuell Beruffer ze interesséieren.

Vum 2. bis de 4. Mee 2022 gëtt an den Hale vun der Luxexpo eng grouss Schoulfoire organiséiert, dëst an Zesummenaarbecht tëscht SFP, SCRIPT a WORLDSKILLS Lëtzebuerg. Hei ginn de Schüler aus dem Enseignement fondamental an dem ënneschte Zyklus vum Enseignement secondaire déi verschidde Beruffer virgestallt; all d'Lycéeën hunn och en eegene Stand, fir sech mat hire Formatiounen virzustellen an déi Jonk an hir Elteren ze interesséieren.

Ad 3) a 4)

Et ass richteg, datt aus Plazgrënn d'BTS-Klasse vum Lycée Josy Barthel dëst Joer am Gebai vun der Blumm um Geesseknäppchen organiséiert ginn. Am Beräich vun der Formation professionnelle gëtt et allerdéngs kee Plazmangel am LJB, sou datt d'Zuel vun den Ausbildungsplazen net limitéiert ass.

Ad 5), 6), 7), 8) a 9)

Déi entspriechend Berufsausbildunge solle viraussichtlech 2028 am Lycée Edward Steichen (LESC) ugebuede ginn, also wann d'Extensioun fäerdeg ass.

Am LESC sollen souwuel Héichbau, wéi och Tiefbau ënnerriicht ginn. Wat den Tiefbau ugeet, ass dëst eng ganz kloer Demande vum Patronat aus dem Klierfer Kanton. Et wäert ee versichen, deeër Demande nozekommen.

Folgend Ausbildung sollen am LESC ugebuede ginn, an zwar an der Formation professionnelle de base an am Apprentissage pour adultes:

DT: génie civil

DAP: dessinateur en bâtiment

DAP: maçonnerie

CCP: maçonnerie

Ad 10)

Mäi Service vun de schouleschen Infrastrukturen an d'Ëffentlech Bauverwaltung schaffen aktuell enk mat der Direktioun vum Lycée Josy Barthel zesummen, fir no Méiglechkeeten ze sichen, de besteeënde Schoulraum auszebauen.

Lëtzebuerg, de 24. Februar 2022

De Minister fir Educatioun,
Kanner a Jugend

(s.) Claude MEISCH